

Հայոց Ցեղասպանութիւնից Մինչեւ Աուշվից

0

Անդրադարձ
March 5, 2015

A+ A-

SHARE ON PRINT PRINT SHARE ON EMAIL EMAIL

ԴՈՎՏ. ՄԱՐԻ ՌՈԶ ԱՔՈՒՍԷՏԵԱՆ


Մէկ ամիս առաջ, յունուարի 27-ին նշուեց Աուշվիցի ազատագրման 70 տարին: Եթէ **ազատագրում** բառը ընդունենք իր իրական, խորը իմաստով, տօնական միջոցառում է, տօնական տրամադրութիւն: Ազատագրուել են միլիոնաւոր մարդիկ գալիք տանջահար մահից: Սակայն քանի որ ազատագրումից առաջ այդ տեղում յատուկ ծրագրուած միջոցներով մօտ երկու միլիոն, տարբեր ազգերից, մարդկային կեանք է անմարդկայնօրէն ոչնչացուել, բնականաբար ինքնըստինքեան միջոցառման կենտրոնացումը աւելի կատարուած ոճրագործութեան, քան ազատագրման տօնակատարութեան վրայ էր:

Կատարուած սպանդի միջոցներն ու կիրառումները իրենց տարողութեամբ այնքան ազդեցիկ են, որ տօնակատարութեան մէջ անգամ իշխող են, ուշադրութիւնն ու տրամադրութիւնը աւելի իրենց վրայ կենտրոնացնող: Յիշատակման ամբողջ իմաստն էլ արդէն այդ է: Փրկուածներին ուշադրութեան կենտրոնում պահելով՝ երբեք մոռացութեան չմատնել գոհուածներին եւ գործուած ոճիրը:



Աուշվից, տեղանունն ինքնին մահուան, խոշտանգումների խորհրդանշան է, երկու միլիոն մարդկային կեանք կուլ տուած որջ:

Հետեւաբար, ահաւոր տխուր, մարդկային պատկերացումից վեր խոշտանգումներով, վայրագութեամբ լեցուած յիշողութիւններ պարփակող մի տեղ է սա, որը դեռ պահպանում, ուշադրութեամբ խնամում եւ ցուցադրում է մարդկութեանը՝ ահազանգելու նմանը չընդօրինակելու, չկրկնելու համար:



Մի տեղանուն, որը մարդկային պատմութեան մէջ յաւէտ արձանագրուեց իբրև սպանդանոց, իբրև միլիոնաւոր մարդկային կեանք ոչնչացրած հնոց:

Անկարելի է լինել այնտեղ, ականատես լինել մարդկային սպանդն անգամ հաշուարկի, շահի ու հետազօտութեան վերացած այդ նողկալի վայրում ու չսոսկալ, չսահմոկել, չքարանալ պատահածի ահռելի տարողութեան առջեւ:

Արդէն 70 տարիներ այստեղ գալիս են ոչ միայն վերապրողների սերունդները, այլ՝ երկրագնդի բոլոր կողմերից, ոչ միայն ականատես լինելու, ծանօթանալու 70 տարի առաջ պատահած սարսափելի եղելութեանը, այլ՝ խոնարհուելու զոհուածների յիշատակի առջեւ, յետ մահու նրանց յաւերժացնելու:

Տարիներ առաջ ես էլ եմ եղել այնտեղ, ահաւոր պահեր ապրել այդ շինութեան տարբեր սենեակներում եւ դրա ճանապարհին: Ես կրկնակի եմ զգացել երկու միլիոն զոհերի՝ հրեայ, լեհ, գնչու, ռուս տանջահար, կազախեղդ եղածների ողբերգութիւնը, չէ՞ որ այն կրկնութիւնն է մեր ժողովրդի միլիոնաւորների կրած տանջանքին: Բայց արդե՞ք դա կրկնութիւնն է: Ո՛չ, դա հետեւութիւնն է: Եթէ չլինէր մեր Յեղասպանութիւնը, չէին լինի նաեւ աուշվիցները, աշխարհի տարբեր երկրների մեծ ու փոքր ջարդերը:

Ես հեռացել եմ ահռելի ցասումով լեցուած նոյն գերմանացիների հանդէպ, որոնք անվրդով ծրագրողն ու մասնակիցը եղան նաեւ մեր Յեղասպանութեան եւ անպարտ մնալով՝ կրկնեցին այն արդէն իրենց ձեռքով, ոչ թէ Արեւելքում, այլ՝ Եւրոպայի սրտում:



Տարիներ յետոյ ես կանգնել եմ Տէր Զօրի անապատում, իմ ժողովրդի ամենածանր արքայապետում, փնտռել եմ մասունքներ ժողովրդիս անասելի տանջանքները կուլ տուած այդ հողում: Իմ աչքերի առջեւ կենդանացել է անուժ, անկարող, հազիւ քարշ եկող, կիսամերկ, ցնցոտիներով ծածկուած մեր որբերի, մեր մայրերի անօգնական նետուած միլիոնատրոնների կարաւանները: Կենդանացել է աւագների մէջ մինչեւ կոկորդը թաղուած, իր մահուան սպասող պատանու դէմքը, նրա աչքերը: Լսել եմ մեծ մօրս եւ իր վեց տարեկան որդու աղիողորմ կանչը եւ համատարած այդ զարհուրելի տեսարանների ճնշումից իմ առջեւ յանկարծ տեսել եմ մեր ողբերգութիւնը կուլ տուած, արդէն մարսած գիւղաքաղաք դարձած մի վայր, որը դեռ կրում է մեզ համար յաւէտ մահաբեր այդ նոյն անունը՝ Տէր Զօր:



Կանգնել եմ նաեւ Մարկատի հայակեր սեւահող բլուրների մէջ եւ իմ ժողովրդի ոսկորների մնացորդները հաւաքել: Ծնրադիր նստել եմ Շետտատի արդէն մաշուած քարանձանների առջեւ եւ իմ էութեան խորքից դուրս եկող բողոքի այլքը խեղդելով՝ փորձել եմ գտնել կանգուն մնացած մի տեղ, իմ ժողովրդի սպանողը վկայող, ապացուցող մի հետք, որ ցուցադրենք աշխարհի հայեացքին ի տես, որ մարդկութեան ողնահարը ցնցուի կատարուած առաջին ցեղասպանութեան ահռելիութեամբ, որ երկրագնդի բոլոր կողմերից գան ու խոնարհուեն մեր անմեղ զոհերի մասունքների առջեւ, իրենց այցելութեամբ յաւերժացնեն նրանց նուիրական յիշատակը: Չէ՞ որ իմ ժողովրդի միլիոնատր անմեղ զոհերն էլ արժանի են դրան:

Ես ասել եմ եւ կրկնելու եմ. աշխարհին անտեղեակ է, որ Շետտատէի եւ դրա պէս տասնեակ խորշեր հայաշատ մեր ձորերի ու քարանձաւների մէջ Աուշվիցի նախատիպերն են: Իմ ժողովրդին ոչնչացնող թշնամին՝ թուրքը, ժամանակ, ինչք եւ դրամ չունէր կազավառարաններ ստեղծելու, մազեր, եղունգներ քաշելու տարբեր տեսակի ու չափի գործիքներ հնարելու: Նա իր նախնական վայրագ տարերքով էր հայութեանը ոչնչացնում՝ կացնով, բահերով, մուրճերով, շիկացած երկաթներով, սրերով, լուցկով, լաւագոյն դէպքում հրացաններով, յագուրդ տալով իր արեան ծարաւին: Տեղահանուած հայութեան՝ երեխայ, կին, ծեր, չափահաս, անչափահաս, հրացանների կոթերով հրում էր քարայրների մէջ, որի բացուածքը փակուում էր չոր խոտերով ու հրդեհում այն: Պատկերացրէք, թէ ի՛նչ զարհուրելի, տանջալից մահ պիտի ապրած լինէին այդ նեղ անցքում իրար վրայ թափուած մեր զոհերը: Այո՛, Շետտատէն աւելի զարհուրելի Աուշվից է եղել իմ ժողովրդի համար:

Աուշվից այցելողները այդ մահակուլ վառարանների առջեւ կեցած՝ սառսրում են, երեւակայութեամբ անգամ քարանում ու անկարողութիւնից հազարապատկուում է այցելուների ցաւակցումը զոհերի հանդէպ: Իրենց մէջ դրոշմուած անջնջելի սոսկումով նրանք հեռանում են՝ ընդմիջտ վերապրելու այդ պահը, ընդմիջտ վառ պահելու զոհերի յիշատակը :

Իմ ժողովրդի էլ աւելի վայրագ ձեւով ոչնչացուած միլիոնաւորները զրկուած են մարդկութեան ամենապարզ ցաւակցութիւնից, նրանց կրած տանջանքների յիշատակը վառ պահելու հնարաւորութիւնից: Մեր թշնամին աւելի «խելացի» էր, քան՝ իրեն հետեւող գերմանացի հետեւորդները: Նա գիտէր, որ բնութիւնը ջնջելու, անհետացնելու էր իր ոճիրների հետքերը, հետեւաբար սպաննածներին անգամ չէր թաղում:

Մենք ոչ միայն չունենք Աուշվիցի վառարաններ՝ աշխարհին ի տես ցուցադրելու, այցելուներին զարհուրեցնելու մեր դէմ գործուած ոճրի ձեւերով, այլ չունենք նոյնիսկ մեր այրուած-ոչնչացուածներից, հազարաւոր մղոններ ձգուող նրանց քայլած ճանապարհներից, անցած ձորերից ու կիրճերից մեզ հասած մասունքներ, թէկուզ՝ մազի մի փունջ, հագուստի մի կտոր, որ ցուցադրենք, որ խոնարհուենք դրանց առջեւ:

Աուշվիցի թանգարանը լեցուն է զոհուածների ճամպուկների, ակնոցների, պայուսակների, կօշիկների, մազերի հաւաքածոյով: Դէպի վառարան առաջնորդուողները վերաբերուներով ու կօշիկներով են եղել: Իսկ իմ ժողովուրդը ցնցոտիների վերածած հագուստներով ու մերկ, ծակծկուած, արիւնլուայ ոտքերով է անցել տարագրութեան ուղին: Իմ ժողովրդին ոչնչացնողները սպանդից առաջ կողոպտել են նոյնիսկ նրանց ցնցոտիները, մերկացրել, նրանց տանջահար մարմինները գազանների կեր դարձրել: Ի՛նչ ակնոցների հաւաքածոյի մասին կարող էր խօսք լինել, երբ նրանց աչքերն են փորել ու շների կեր դարձրել: Երբ մեր որբերին ճիպոտների հարուածների տակ ստիպել են կանգնել ու անթարթ արեւին նայել տալով՝ վերջնականապէս կուրացրել: Ինչ, ինչ պահպանուած յիշատակի մասին կարող ենք մտածել: Դեռ շնորհակալ ենք բնութիւնից, որ պահպանել է միայն ոսկորների եւ գանկերի մի աննշան հաւաքածու ցիր ու ցան, այն էլ՝

մեր միջոցներով հաւաքած, տարբեր եկեղեցիների, մատուռների եւ թանգարանների ցուցափեղկերում հազիւ հանգչող: Համեմատաբար մեծ հաւաքածոն հէնց սպանդի ամենաթեժ տեղում՝ Տէր Զօրում, նոյն տեղի մեր եկեղեցւոյ մատուռում պահուած, վերջերս ոչնչացուեց նոյն ցեղասպանի ձեռքով: Յեղասպանութեամբ ոչնչացուած մեր ժողովրդի ոսկորներն անգամ մինչեւ այսօր էլ կրկնակի ոչնչացուում են, ռումբերի տարափով փոշիանում, կորչում են, մինչդեռ Աուշվիցի զոհերը աշխարհի ուշադրութեան եւ փայփայանքին են արժանանում:

Աուշվիցի ազատագրման տօնակատարութիւնը զոհերի շառաւիղները դարձրել են տխրութեամբ ու անասելի ցաւով լեցուն յիշատակման օր:

Իսկ մենք մեր անհամեմատելի զարհուրելի Յեղասպանութեան այս հսկայ տարելիցը փորձում ենք տխրութեան չվերածել, այլ՝ դարձնել մեր վերածնութեան օրը: Ամէնուրեք այս նոյն տրամադրութիւնն է իշխում մեր շրջապատում, մերժում են նոյնիսկ Յեղասպանութիւնը ներկայացնող գործեր հրամցնել ժողովրդին: Համատարած հոգեհանգիստներից զատ, ուզում են միայն հերոսական, ժողովրդի տրամադրութիւնը բարձրացնող գործեր լսել:

Նոյնիսկ 100-րդ տարելիցի խորհրդանշանը դարձրել ենք գունեղ ծաղկի մի թերթիկ, կարծես բնութեան աղէտի տարելից ենք նշում:

Բայց չէ՞ որ մենք դեռ պահանջ ունենք մեզ ոչնչացնողից, մեր գրքերում պահուած քարտէսներ ունենք արեան կէտերով լեցուած: Ինչո՞ւ չուզեցինք արեան կէտերի այդ քարտէսը, որը ոչ միայն մեր միլիոնաւոր զոհերի արիւնն է ներկայացնում, այլ՝ մեր խլում անհատարածքներն ու տեղահանուած հայութեան բզկտուած քայլերի արիւնոտուած ճանապարհը, դարձնել կրծքանշան, խորհրդանշան, ծածանուող դրօշ, որ աշխարհը տեսնի, ծանօթանայ եղելութեանը: Որ աշխարհին մեր պատգամը լինի՝ **այդ զարհուրելի քարտէսը երբեք չկրկնուի որեւէ ժողովրդի պատմութեան մէջ:**

Եթէ մենք ուզում ենք շարունակել մեր պահանջատիրութիւնը, ուրեմն պէտք էր սերունդների աչքերում, հայ թէ օտար, դրոշմէինք այդ զարհուրանքի քարտէսը, յիշեցնելու մեր տեղահանուած ժողովրդի չարաչար սպանդով անցած ե՛ւ արեան ճամբան, ե՛ւ մեր դարաւոր երկրի՝ Արեւմտահայաստանի խլում ատարածքները: Շեշտելու մեր կեցուածքը եւ արիւնով ներկուած քարտէսների եւ յափշտակուած տարածքների մեր պահանջատիրութեան մասին:

Ընդամենը 70 տարի է անցել Աուշվիցի ազատագրումից, եւ այդ տարիներին գերմանացի մարդասպանները աշխարհի օգնութեամբ, աշխարհի աչքի առջեւ դատապարտուեցին մահուան: Աշխարհը օգնեց, որ հրեայ զոհերի շառաւիղները երկիր ունենան: Իսկ Գերմանիան մինչեւ օրս փոխհատուցում է իր գործած ոճիրի համար:

Այս օրերին յարգելով Աուշվիցի զոհերի յիշատակը՝ ուզում ենք աշխարհին յիշեցնել, որ ամենաառաջին եւ ամենաահարկու, դեռ չդատապարտուած Հայոց ցեղասպանութեան 100-րդ տարելիցն է մօտենում, ուր հայութիւնը ամենավայրագ սպանողով կորցրեց ոչ միայն միլիոնաւոր ժողովուրդ, այլ՝ դարաւոր հսկայական հողատարածք, մի ամբողջ ժողովրդի ապրած կեանք ու պատմութիւն, մի ամբողջ հոգեւոր սնունդ, դիմագիծ ու հազարաւոր տարիներ ձեւաւորուած աւանդոյթ, անհաշուելի թուով ունեցուածքներ, մեր գալիք սերունդների ամբողջ անցեալն ու ապագան:

Յիշեցնել, որ ցեղասպանը՝ թուրքը, դեռ դատապարտուած չէ, դեռ ժխտում է իր գործած ոճիրը, փորձում է խուսափել պատասխանատուութիւնից, ետ ջանձնել մեզնից իլաւ մեր տարածքները, մեզնից իւրացրած ունեցուածքները եւ նրանց շահագործումից իրենց ստացածները:

Մեր ցեղասպանութեան շրջանում դեռ մենք այսօրուայ պէս հասու չէինք մեր դէմ կատարուող դաւադրութեան: Հասու չէինք հօգօրների խաղերին եւ որպէս անգլուխ ու անօգնական ժողովուրդ երկար տարիներ լռեցինք ու ձգձգեցինք մեր պահանջատիրութիւնը՝ յոյսերս դրած աշխարհի արդարամիտ պաշտպանութեան:

Այսօր ոչ միայն հասու ենք այդ ամէնին, ականատես ենք նաեւ աշխարհում կատարուող նոր վայրագ սպանութիւններին եւ աշխարհի ցուցաբերած անտարբերութեան:

Անցած 100 տարիների մեր անասելի դժուար ու փոթորկոտ ճանապարհին մենք երբեք չվարանեցինք ու չմոռացանք մեր դէմ կատարուած եւ դեռ իր լուծումին սպասող Ցեղասպանութեան հատուցմանը հասնելու համար: Կարողացանք մեր ուղին գտնել, անկախացած երկիր ստեղծել, մեր ժողովրդի իրաւունքներն ու ճակատագիրը մեր կառավարութեան յանձնել :

Ամենակարեւորը՝ Ցեղասպանութիւնից մազապուրծ փրկուածների, որբերի շառաւիղների մի հոյակապ սերունդ օտար երկնքների տակ ապաստան գտած հասակ առաւ, ովքեր ականատես ու ականջալուր եղան իրենց ծնողների ապրած ողբերգութիւններին ու երդուեցին իրագործել նրանց պատգամը՝ **պահանջատէր լինել վայրագօրէն իրենցից իլուած կեանքերի, իրենց իրաւունքների, իրենցից իլուած տարածքային եւ ունեցուածքների կորուստների եւ գալիք սերունդների իրաւունքների համար:**

Այս 100-րդ տարելիցը պարտաւոր ենք դարձնելու, ոչ թէ սոսկ յիշատակի, այլ միլիոնաւոր մեր զոհերի մեզ կտակած պատգամի վերանորոգման, այն հետապնդելու եւ այն իրականացնելու նոր ծրագրի սկիզբ: Չվախենանք տխրելուց ու լացից, չխորշենք կրկին ու կրկին կոտորածի պատկերներ տեսնելուց: Դրանց մշտական ներկայութիւնն է մարդկանց զգաստ պահում:

Այս խորհրդանշական օրը դարձնենք մեր պահանջատիրութեան ոչ միայն շարունակութիւն, այլ մի նոր փուլ՝ առանց զիջումի եւ առանց վարանումի

հետապնդելու: Դաս առնենք մեր սխալներից, օգտունենք մեր Ցեղասպանութիւնը հաստատող փաստագրական թղթածրարների, լուսանկարների հսկայական հաւաքածոյից, մեր թշնամու եւ տարբեր երկրների պետական, զինուորական, դիւանագիտական արխիւներում պահուած: Դրանք վկայակոչելով, ցուցադրելով՝ նախ պատմական մի սխալ ճշդենք, որ թուրքն է առաջին անգամ ցեղասպանութիւն իրագործել եւ գերմանացին տեսնելով, որ նա չդատապարտուեց աշխարհի կողմից, ինքն էլ համարձակուեց Աուշվիցիներ, Մայտանէքեր, Տախաոներ ստեղծել: Եւ երկրորդ՝ այդ փաստարկ-ծրարներով ցեղասպանին աշխարհի դատին ներկայացնենք, հատուցում պահանջենք:

Որպէս մէկ միասնական հայ ժողովուրդ՝ սկիզբ դնենք մեր պահանջատիրութեան նոր փուլին:

Ցեղասպանութիւնը մենաշնորհ չէ, եւ եթէ մենք դեռ խօսում ենք այդ մասին, դեռ դատապարտում ենք ու պահանջ ունենք ցեղասպանից, այդ նշանակում է, որ դա անջնջելի ցաւ է, անանցանելի ոճիր, որի հետքերը դաջուած մնում են սերունդների բջիջների մէջ, որոնք հազար տարի յետոյ էլ արձագանգելու են աշխարհում գործուող իւրաքանչիւր սպանդին, իւրաքանչիւր անգամ ազդարարելով՝ **աշխարհի մարդիկ դատապարտէք Ցեղասպանութիւնը, ու պահանջատէր եղէք Ցեղասպանից, որ երկրագունդը մարդկային կեցութեան ապահով ապաստան դառնայ:**

Ման Տրանսիսթօ

25 փետրուար, 2015թ.

LIKE TO SHARE? LEAVE A REPLY

From: norapar@hotmail.com

To: marieabousd@gmail.com

Subject: Յօդուածդ....

Date: Mon, 2 Mar 2015 11:40:16 +0200

Ցնցիչ, յուզիչ, պոռթկացող, բարկացող, լացող եւ զգաստութեան կոչ ուղղող...

Արցունքով աչքերով, ճմլուող սիրտով եւ սեղմած ափով կարդացի գրութիւնդ, ես ինձի հարցնելով, որ պիտի գա՞յ այդ օրը, արդարութեան օրը, հատուցման օրը, պիտի գա՞յ այդ պահը, որ մեր զաւակներուն պատմենք, որ մենք Ցեղասպանութեան ենթարկուած եւ ատոր փոխարէն հատուցում ստացած ժողովուրդ ենք:

Շնորհակալ եմ, որ գրեցիր:

Միքով եւ խոր յարգանքով

Նորա

Your email address will not be published. Required fields are marked *

Name *

Email *

Website

Comment